



IKINYAMAKURU K'IMIHINDAGURIKIRE Y'IKIRERE N° 27, KIGENEWE

ABAHINZI- BOROZI IGICE CYA GATATU NZERI (21- 30), 2020

Cyasohotse ku itariki ya 2 Ukwakira 2020

Incamake


Mu minsi icumi y'igice cya gatatu, Nzeri 2020 kuva tariki ya 21 kugeza tariki ya 30, byagaragaye ko isangano ry'imiyaga ryari mu karere u Rwanda ruherereyemo, ibi byatumye imvura yiyongera ugereranyije n'ibice bibiri by'ukwezi kwa Nzeri byabanje. Imvura iri hejuru y'ikigereranyo cy'impuzandengo y'imvura isanzwe igwa yapimwe ahenshi mu mu gihugu. Igiteranyo cy'imvura nyinshi yapimwe mu Ntara y'Iburengerazuba ku bupimiro bwa Ntendezi aho hapimwe milimetero 151.9 mu minsi irindwi na Karama-Kilimbi hapimwe milimetero 138.7 mu minsi irindwi naho ku bupimiro bwa Rubengera hapimwe milimetero 99.5 mu minsi irindwi. Ahapimwe imvura nke iri muni ya milimetero 10 ni ku bupimiro bwa Mwiri mu karere ka Kayonza hapimwe milimetero 9 na Nyagahanga mu karere ka Gatsibo hapimwe milimetero 4. Ibipimo by'ubushyuhe ni nk'ibisanzwe mu gice cya gatatu cya Nzeri, aho igipimo cy'ubushyuhe bwo hejuru cyari hagati ya dogere Selisiyusi (°C) 21.8 muri Gicumbi na Musanze ku bupimiro bwa Busogo ndetse na dogere Selisiyusi 31.7°C muri Rusizi ku bupimiro bwa Bugarama naho igipimo cy'ubushyuhe bwo hasi cyari hagati ya 11.5°C muri Musanze ku bupimiro bwa Busogo na 19.5°C ku bupimiro bwa Bugarama. Ubuhehere bw'ubutaka bwariyongereye bituma imirimo y'ubuhinzi n'ubworozi ikomeza mu gihugu hose.

1.0. Imvura yaguye

Aha turerekana ingano y'imvura yaguye, umubare w'iminsi imvura yaguye n'ubuhehere bw'ubutaka mu minsi icumi y'igice cya gatatu cya Nzeri 2020.

1.1. Ingano y'imvura yaguye

Ikarita ya mbere hasi irekanya ingano y'imvura yaguye mu minsi icumi y'igice cya gatatu cya Nzeri 2020. Muri iki gice cya gatatu imvura yapimwe yari iri hejuru y'impuzandengo y'imvura isanzwe igwa ahenshi mu gihugu. Igiteranyo cy'imvura ingana na milimetero 151.9 yapimwe ku bupimiro bwa Ntendezi mu minsi irindwi ikaba ari nayo yari nyinshi, naho iyabaye nke cyane yari muni ya milimetero 5, ikaba yarabonetse ku bupimiro bwa Nyagahanga.




Ikarita ya 1: Ingano y'Imvura yaguye mu gice cya gatatu cya Nzeri 2020

1.2 Impuzandengo y'imvura isanzwe igwa mu minsi icumi y'igice cya gatatu cya Nzeri

Ufatiye ku bipimo by'igihe kirekire, ikarita ya kabiri iratwerekanya imvura isanzwe igwa mu minsi icumi y'igice cya gatatu cya Nzeri. Ubusanzwe igice cya gatatu cya Nzeri kigusha imvura iri hagati ya milimetero 12.3 na milimetero 75;


bigaragara ko ugereranyije imvura yaguye n'isanzwe igwa mu gihe kirekire, imvura yabaye nyinshi mu bice byinshi by'igihugu cyane cyane mu ntara y'Iburengerazuba n'iy'Amajepfo.



Ikarita ya 2: Imvura isanzwe igwa mu gice cya gatatu cy'ukwezi kwa Nzeri

1.3. Umubare w'iminsi imvura yaguyemo

Ikarita ya 3 iragaragaza umubare w'iminsi imvura yaguyemo, mu gice cya gatatu mu kwezi kwa Nzeri 2020. Umunsi tubara ko wagushije imvura ni uwapimweho byibuzwe milimetero 0.85 cyangwa nyinshi. Muri iki gice nibura ahantu henshi hagushije imvura hagati y'iminsi itanu n'umunani uretse ku bupimiro bwo mu Ntara y'Iburasirazuba haguye imvura mu minsi iri muni y'itanu.



Ikarita ya 3: Umubare w'iminsi imvura yaguyemo

1.4 Ubuhehere bw'Ubutaka

Aha turagaragaza muri rusange uko ubuhehere bw'ubutaka bwari bumeze. Ahenshi mu gihugu ubuhehere bw'ubutaka muri iyi minsi icumi y'igice cya gatatu cya Nzeri 2020 bwiyoungereye bitewe n'ibihe by'imvura byaranze iyi minsi. Hateganyijwe ko ubuhehere bw'ubutaka buzakomeza kwiyongera mu gice cya mbere cy'Ukwakira bitewe n'uko ibihe by'imvura biteganyijwe kwiyongera.


2.0. Iyipimo by'ubushyuhe

Aha turareba muri rusange uko ibipimo by'ubushyuhe bwo hejuru no hasi hirya no hino mu gihugu byari bimeze.

2.1 Iyipimo cy'ubushyuhe bwo hejuru

Ikarita ya 4 irekana ubushyuhe bwo hejuru. Ugendeye ku bipimo by'ubushyuhe dusanzwe dupima, ahenshi mu gihugu ubushyuhe bwari mu kigereranyo cy'impuzandengo y'igihe kirekire; mu Ntara y'Iburasirazuba, mu Mujyi wa Kigali, ndetse n'igice kinini cy'Iburengerazuba cyane cyane mu Majyepfo yaho niho hashyushye kurusha ahandi. Mu Ntara y'Amajyaruguru, iy'Amajyepfo n'igice kinini cy'Intara y'Iburengerazuba akaba ariho hakonje ugereranyije n'ahandi mu gihugu.


Iyipimo by'ubushyuhe byari hagati ya dogere Selisiyusi 21.8 na 28.9 ahenshi mu gihugu; uretse ku bupimiro bwa Nyagahanga bapimye dogere selisiyusi 29.1 no ku bupimiro bwa Bugarama hashyushye cyane hapimwe dogere selisiyusi 31.7.



Ikarita ya 4: Ubushyuhe bwo hejuru

2.2. Iyipimo cy'ubushyuhe bwo hasi

Ikarita ya gatanu irekana uko ubushyuhe bwo hasi bwanganaga. Ubushyuhe bwo hasi bwari hagati ya dogere Selisiyusi 11.5⁰C (Busogo) na dogere Selisiyusi 19.5⁰C ku bupimiro bwa Bugarama. Mu Majyaruguru y' u Rwanda niho hakonje cyane kurusha ahandi mu gihugu.




Ikarita ya 5: Ubushyuhe bwo hasi

3.0 Iteganyagihe rigenewe abahinzi mu minsi icumi y'igice cya mbere cy'Ukwakira (tariki 01-10) 2020

3.1 Ikirere giteganyijwe

Mu gice cya mbere cy'ukwezi k'Ukwakira 2020(hagati y'italiki ya 1 n'iy'10) mu Rwanda hateganyijwe imvura iri hagati ya milimetero 10 na 80mm. Imvura iri hagati ya milimetero 10 na 30 iteganyijwe mu ntara y'Iburasirazuba no mu mujyi wa Kigali ariko agace gato k'iburasirazuba bw'akarere ka Nyagatare na Gatsibo hateganyijwe imvura izagera kuri milimetero 40. Mu ntara y'Amajyepfo hateganyijwe imvura iri hagati ya milimetero 20 na 50 ariko uturere twa Nyaruguru na Nyamagabe tukazagira imvura izagera kuri milimetero 80. Mu ntara y'Iburengerazuba n'Amajyaruguru hateganyijwe imvura iri hagati ya milimetero 40 na 80. Ushaka ibisobanuro birambuye yakwifashisha ikarita iri kuri iri iteganyagihe.

Imvura iteganyijwe kugwa ku mataliki ya 1, n'iy'2 no kuva taliki ya 8 kugera mu mpera z'iminsi icumi ariko mu ntara y'Amajyarugu, Iburengerazuba hiyongereyeho uturere twa Nyamagabe na Nyaruguru, imvura nke ikazagwa no kuyandi mataliki. Imvura iteganyijwe izaturuka ku isangano ry'imiyaga rihereye muri Afrika y'Iburasirazuba ikazumvikanamo inkuba ndetse ikazaba arimo n'umuyaga ahenshi. Imvura iteganyijwe iri kukigero cy'impuzandengo y'imvura isanzwe igwa muri iyi minsi icum iy'ukwezi k'Ukwakira.



Ikarita ya 6: Iteganyagihe ry'imvura mu gice cya mbere cy'Ukwakira 2020.

3.2 Ibirebana n'imirimo y'ubuhinzi

Inzego z'ubuhinzi ziragirwa inama yo kwihutisha imirimo yo gutegura imirima, kwihutisha kugeza inyongeramusaruro ku bahinzi, guterera ku gihe no gutegura ibikoresho byifashishwa mu mirimo yo kuhira cyane cyane mu bice bikunze kugira imvura idahagije ndetse no kwita ku mihingire ibika amazi mu butaka. Muri iki gice cya gatatu imirimo izibandwaho cyane ni iyo gutera imbuto zitandukanye. Abahinzi barashishikarizwa gukomeza kugisha inama abashinzwe ubuhinzi babegereye mu gukomeza gutegura neza imirimo ijyanye n'ubuhinzi. Barashishikarizwa kandi kujya basura urubuga rwa Meteo Rwanda www.meteorwanda.gov.rw, cg guhamagara umurongo utishyurwa 6080.